

摘藻堂四庫全書薈要

經部

欽定四庫全書薈要

經部

欽定周官義疏卷三十九

詳校官編修臣程嘉謨



欽定四庫全書薈要卷二千四百二

經部

欽定周官義疏卷三十九

秋官司寇第五之六

司儀掌九儀之賓客擯相之禮以詔儀容辭令揖讓之

節
亮反

正義鄭氏康成曰出接賓曰擯入相禮曰相以詔者

以禮告王

賈疏九儀即大行人九儀命者五爵者四
是也出接賓曰擯者下文交擯在門外是

也入贊禮曰相者下文及廟惟上相入
是也以禮告王者下文詔王儀是也

易氏祓曰

九儀即大行人所掌是也司儀特掌其中賓客擯相之禮而已鄭氏鍔曰儀容通形貌而言辭令以應對言揖讓以交接言

將合諸侯則令為壇三成宮旁一門

正義鄭氏康成曰合諸侯謂有事而會也

賈疏左傳文

為

壇於國外以命事宮謂壝土以為牆處所謂為壇壝

宮也

賈疏掌舍為壇壝宮

覲禮曰諸侯覲於天子為宮方三百

步四門壇十有二尋深四尺是也

鄭氏鍔曰其制為壇三成即覲禮所

謂深四尺者是也蓋從下向上為深發地一尺上有三成則總四尺矣宮旁一門即覲禮所謂宮方三百步四門是也蓋封土為壇壇外為宮每旁一門則四門矣王巡守殷國則其為宮

亦如此與鄭氏衆曰三成三重也爾雅云丘一成為敦丘再成為陶丘三成為昆侖丘謂三重王氏安石曰壇三成為三等公於上等侯伯於中等子男於下等是也賈氏公彥曰令令封人敖氏繼公曰四方諸侯皆來於是為壇壝宮於國門外之南方而受之此所謂大朝覲也宮者築宮牆也

案凡朝覲諸侯將幣王禮諸侯皆於廟無所為壇儀
禮覲禮既終附載為壇帥諸侯以朝日反祀方明乃
此經所謂合諸侯大宰職所謂大朝覲會同也鄭氏
鑄易氏祓見覲禮稱諸侯覲于天子為宮方三百步
遂謂凡朝覲皆有壇不知饗禮乃歸以前覲禮之本
文也饗之禮之而歸其國則覲事終矣復言諸侯覲
于天子為宮云云乃記者更端略舉大朝覲會同之
禮不與上相屬也

存疑鄭氏康成曰天子春帥諸侯拜日於東郊則為壇於國東夏禮日於南郊則為壇於國南秋禮山川丘陵於西郊則為壇於國西冬禮月四瀆於北郊則為壇於國北既拜禮而還加方明於壇上而祀焉所以教尊尊也

案覲禮所云禮日於南門外禮月與四瀆於北門外禮山川丘陵於西門外者蓋繼拜日祀方明之後相屬而為之非四時之異也門即謂壇宮之四門非國

門也詳見儀禮

詔王儀南鄉見諸侯土揖庶姓時揖異姓天揖同姓

鄉許

亮反

正義鄭氏康成曰諸侯上介皆奉其君之旂置于宮

乃詔王升壇諸侯皆就其旂而立

案覲禮注云諸侯入壇門或左或右

各就其旂而立王降階南鄉見之三揖與此互相備

庶姓無親者也土揖推手

小下之也異姓昏姻也時揖平推手也衛將軍文子

篇獨居思仁公言言義其聞詩也一日三復白圭之

玷是南宮縚之行也夫子信其仁以爲異姓謂妻之

也

賈疏此大戴記子貢答將軍文子之辭
案注引此者證異姓爲昏姻也

天揖推手小

舉之 賈氏公彥曰諸侯各就位立王在壇亦立司

儀乃告王升壇南鄉見諸侯乃揖之先疎後親爲次
歐陽氏謙之曰天揖舉手高尊之也時揖舉手平
次之也土揖舉手近下卑之也

存疑鄭氏康成曰諸公中階之前北面東上諸侯東
階之東西面北上諸伯西階之西東面北上諸子門

東北面東上諸男門西北面東上王揖之者定其位也

案壇三成每成高一尺則無階也壇宮雖有四門諸侯則皆從南門入其位則自西而東皆北面與明堂位朝事義所言諸侯之位異諸侯既就位王乃於壇上揖之揖之者升之也

及其擯之各以其禮公于上等侯伯于中等子男于下等其將幣亦如之其禮亦如之

正義鄭氏康成曰謂執玉而前見於王也

賈疏下云將幣據三

享故知此文據執玉見王

上等等者謂所奠玉處也壇

三成深四尺

賈疏深四尺觀禮文

則一等一尺也

賈疏發地一尺上有三成

爲三尺總四尺壇十有二尋

賈疏觀禮丈

方九十六尺則堂上二

丈四尺每等丈二尺與

賈疏以尋八尺計之得九十六尺上二丈四尺爲堂王立

之處并祀方明之所

諸侯各於其等奠玉降拜升成拜明臣禮

也既乃升堂授王玉

賈疏公奠玉於上等降拜於中等侯伯奠玉於中等降拜於下

等子男奠玉於下等降拜於地及升成拜皆於奠玉之處知有降拜升成拜者約燕禮王既受玉約聘禮

亦當授將幣享也禮謂以鬱鬯裸之也皆於其等之宰玉

上賈疏即大行人上公再裸而酢亦如公於上等之類

存疑鄭氏康成曰擯之各以其禮者謂擯公者五人侯伯四人子男三人也

案擯之謂上擯延之使升也是時上擯蓋立於壇之上等稍東而西面以擯升降而傳辭承擯以下立於門東北面之位以羣侯立於三等之壇爲地無幾不能容多人也一朝三享所謂四傳擯也禮亦如之又

在四傳擯之外禮之蓋一裸而已無酢亦不授几地
窄人多諸禮從簡可知

王燕則諸侯毛

正義鄭氏衆曰毛謂老者在上也老者二毛故曰毛
鄭氏康成曰謂以須髮坐也朝事尊尊上爵燕則
親親尚齒 易氏祓曰王揖諸侯則親親而序族擯
則尊尊而序爵燕則老老而序齒

案此亦謂因合諸侯而燕也既於國外則離宮別館

皆可以燕不必於寢矣坐次以毛如祭畢而燕之禮
以其禮殺於饗食故也亦膳夫爲主人賓則以諸侯
齒最長者爲之而無苟敬亦不煩臨時請賓而王命
之也經云則似亦有不燕時蓋發禁施政容有不需
日而遽行者

凡諸公相爲賓

正義鄭氏康成曰謂相朝也

賈疏相朝是兩公自相朝下經云諸侯諸伯諸

子諸男相爲賓以禮相待並是兩諸侯相朝之事

鄭氏鍔曰此下記侯國之

禮儀

案諸侯之邦交於大行人之終畧見其凡其禮儀則詳於司儀其共具則詳於掌客列職之差也大小行人所掌皆天子所以禮諸侯也司儀掌客掌天子禮諸侯之儀物而并掌列國相爲賓相爲客之儀物蓋以其秩叙定爲典籍而頒布使行之

主國五積三問皆三辭拜受皆旅擯

積子賜反旅如字又音臚

正義鄭氏康成曰賓所停止則積

賈疏遺人職五十里有市市有候館

候館有積是也

閒濶則問其禮皆使大夫致之

賈疏下句云致飧如致積

之禮知致飧使大夫者聘禮宰夫朝服設飧宰夫即大夫問亦小禮明亦使大夫也

從來至去

數如此也

賈疏五積三問再勞來去皆有此數

三辭辭其以禮來於外

也積問不言登受之於庭也旅讀爲鴻臚之臚臚陳

之也賓之介九人

賈疏自從公介九人之禮

使者七人

賈疏自從降二等之

禮皆陳擯位不傳辭也賓之上介出請使者則前對

位皆當其末擯焉

鄭氏鍔曰旅擯者不上下相傳直賓及上擯相對而語不交擯也兩

君相見則交擯使卿大夫致之臣道卑直對之可知

辨正賈氏公彥曰先鄭讀旅爲旅於泰山之旅謂九人傳辭相授後鄭不從者下文云主君郊勞交擯三辭明與此別旅直陳擯介不傳辭交則一往一來傳辭也

再勞三辭三揖登拜受拜送

勞力報反下同

正義鄭氏康成曰行道則勞其禮使卿致之

賈疏聘禮賓至

近郊君使卿勞臣來尚遣卿勞明君來卿勞可知

三揖謂庭中時也

賈疏謂如聘禮

入門揖當曲揖當碑揖

拜送送使者

賈氏公彥曰再勞者一

勞在境一勞在遠郊皆使卿其近郊勞主君親為之

也

王氏詳說曰聘禮遣卿行勞禮勞臣以卿則勞君以卿明矣

主君郊勞交擯三辭車逆拜辱三揖三辭拜受車送三

還再拜致館亦如之

還音旋下同

正義鄭氏康成曰主君郊勞備三勞而親之也交擯

者各陳九介使傳辭也

賈疏交擯者主君至郊郊有館舍賓在內主君至大門外

北面而陳九介去門九十步東面賓在大門內於門外之東亦陳九介西面以其在道俱不為主故無五擯之事交擯者上擯傳辭與承承擯承擯傳與末末擯傳與末介末介傳與承介承介傳與上介上介傳

與賓賓又傳與上介上介傳與承介承介傳與末介
末介傳與末摯末摯傳與承摯承摯傳與上摯上摯
入告謂車迎拜辱者賓以主君親來乘車出舍門而
之交摯

迎之若欲遠就之然見之則下拜迎謝其自屈辱來
也至去又出車若欲遠送然主君三還辭之乃再拜
送之也車送迎之節各以其等則諸公九十步立當

車軹也

賈疏賓主俱立當軹大行人文

三辭重者先辭辭其以禮來

於外後辭辭升堂館舍也使大夫授之君又以禮親

致焉

賈疏凡云致者皆有幣以致之

賈氏公彥曰拜受賓再拜乃

受幣主君亦當拜送不言省文也 敖氏繼公曰凡

拜送賓者皆於其既退乃拜之故賓不答拜異於迎

也

案儀禮鄉飲酒禮畢主人送賓介於門外再拜鄭注云賓介不答拜禮有終也

通論王氏詳說曰天子之於諸侯其館之也賜舍而已至諸侯相爲賓則有致館之禮焉案覲禮曰賜伯父舍但使人以命致之初無束帛而侯氏受館僎使者用束帛乘馬所以尊王使也賈疏賜館致命者蓋司空眡館者小行人也此云致館亦如之繼主君郊

勞後故知其君親致也注謂使大夫授者以聘禮大夫帥至館卿致之耳但彼授館於聘使故使大夫此諸侯相為賓既親致館則授館當使卿與

致飧如致積之禮

飧素尊反

正義鄭氏康成曰俱使大夫禮同也飧食也小禮曰

飧

鄭氏鍔曰賓已入館乃飧飧夕食也言其微而大寡也王氏昭禹曰三辭拜受旅擯與致積同大

禮曰饗餼王氏詳說曰注謂致積致飧使大夫者

以聘禮使宰夫朝服設飧而積視飧牽耳然此諸侯

相爲賓君既親致館則致餼與積似當使卿

及將幣交擯三辭車逆拜辱賓車進答拜三揖三讓每
門止一相及廟惟上相入賓三揖三讓登再拜授幣賓
拜送幣每事如初賓亦如之

相悉亮反授依注作受
賓亦如之依注作僨

正義賈氏公彥曰將幣謂行朝禮之時幣即圭璋也
此交擯賓陳九介主君陳五擯而傳命 鄭氏康成

曰既三辭主君則乘車出大門外而迎賓見之而下

拜其辱

賈疏傳辭既訖主君乘車出大門至賓所下
車拜賓屈辱來此也 王氏詳說曰郊勞賓

車迎主君而拜其辱者謝主君之遠出此將幣主君車逆賓而拜其辱者謝賓之遠來也賓車乃

前下答拜也

賈疏賓乘車進就主君主君下賓亦下車答主君拜也

三揖者相

去九十步揖之使前也

王氏詳說曰車逆之後未入大門故知揖者在朝位賓主

之間揖之使前

至而三讓讓入門也

賈疏主君遙揖賓使前北面三讓入大門也

相謂主君擯者及賓之介也謂之相者於外傳辭耳

入門當以禮詔侑也介紹而傳命君子於其所尊不

敢質敬之至也

賈疏聘義文

每門止一相彌相親也

賈疏既入

門迴面東至祖廟之時祖廟西仍有二廟以諸侯五廟始祖廟在中兩廂各有二廟各別院為之則有兩

門門旁皆有南北隔
牆皆通門故曰每門
君入門介拂闌大夫中
張與闌

之閒士介拂張

賈疏玉藻文

此謂介鴈行相隨也

賈疏君入由闌

西亦拂闌不言之者
特行不與介連類故也

止之者絕行在後耳

賈疏聘禮介皆

入廟門門西北面西上此介亦入門門西北
面西上可知故云絕行在後在後亦入廟也

賓三揖

三讓讓升也

賈疏三讓者至階主君讓賓賓讓主君如是者三主君先升

登再拜

授幣授當為受

賈疏受玉者主君

主人拜至且受玉也

賈疏拜中

舍此

每事如初謂享及有言也

賈疏案聘禮若有言束帛如享禮是也

賓當為儐謂以鬱鬯禮賓也上於下曰禮敵者曰儐

禮器曰諸侯相朝灌用鬱鬯無籩豆之薦謂此朝禮

畢儐賓也

王氏詳說曰不曰禮而曰儐者案覲禮云賜伯父舍侯氏再拜稽首受儐之束帛乘

馬是侯氏之禮於天子使者曰儐故兩君相禮亦曰儐 邾氏敬曰儐亦如之揖讓拜同

賈氏

公彥曰上相入者上相即上擯上介須詔禮故入賓拜送幣者賓既授乃退向西階上北面拜送幣乃降也 鄭氏鏐曰將幣交擯三辭者蓋主君謙不敢當其將幣之禮

案此諸公相賓及下經諸公之臣相爲國客賈疏皆

以將幣爲用圭璋則是正行朝聘之禮而非直以三享當之矣大行人職之廟中將幣亦爲正行朝禮受玉可推彼注似謬當以此正之詳見彼職

及出車送三請三進再拜賓三還三辭告辟

辟音避

正義鄭氏康成曰三請三進請賓就車也主君每一請車一進欲遠送之也三還三辭主君一請賓亦一還一辭

案主君出送以車從備賓退乘以入且若將遠送故

賓辭也及三辭則賓告辟以主君將拜驅而辟之不
欲見主人之拜也主君再拜當在賓告辟後而序於
前見賓告辟時主君即拜而賓已辟然後主賓之敬
皆曲盡而各得其安也 入時自大門外步行入廟
故直言三揖三讓也出時亦步行至大門外送升車
而別

致饗餼還圭饗食致贈郊送皆如將幣之儀

還音環食音嗣下同

正義鄭氏康成曰主君親往則賓為主人主人為賓

君如有故不親饗食則使大夫以酬幣侑幣致之聘
以圭璋禮也享以璧琮財也已聘而還圭璋輕財而
重禮賈疏聘義文贈送以財既贈又送至於郊 王氏詳
說曰聘禮使卿歸饗餼使卿歸圭於館此六禮皆如
將幣之儀則主君親往也

案注謂六禮惟饗食速賓其餘主君親往非也冠禮
之賓儕輩也主人猶親速况敵體之國君乎

賓之拜禮拜饗餼拜饗食

正義鄭氏康成曰鄭司農云賓之拜禮者因言賓所當拜者之禮也所當拜者拜饗餼拜饗食某謂賓將去就朝拜謝此三禮三禮禮之重者也賓既拜主君乃至館贈之去又送之於郊 賈氏公彥曰案聘禮饗餼燕羞俶獻之明日賓皆拜於朝將去又三拜乘禽於朝彼臣故盡拜謝此賓之拜禮在致贈郊送之下則不及燕羞俶獻乘禽以其君略小惠將去惟拜其大禮也

案主君親郊勞致館而拜禮不及何也二禮以拜其來朝之辱也故賓無庸拜之不拜還圭者還圭非加禮也

賓繼主君皆如主國之禮

正義鄭氏康成曰繼主君者僨主君也

賈疏僨者報也報主君為

僨聘禮賓至郊君使卿勞賓用束錦僨勞者君使卿韋弁歸饔餼大夫奉束帛賓降授老幣出迎大夫注云出迎欲僨之庭實設馬乘賓降受老束錦西面致幣是皆有僨法僨之者主君郊勞

致館饔餼還圭贈郊送之時也

賈疏聘禮致館無僨彼君使卿致館不以

幣故無償此兩君致時有幣合償之也

如其禮者謂玉帛皮馬也有饌

陳之積者不如也

諸侯諸伯諸子諸男之相爲賓也各以其禮相待也如諸公之儀

正義鄭氏康成曰賓主相待之儀與諸公同也饔餼

饗食之禮則有降殺

賈疏五等諸侯以命數分爲三等其圭璋饔餼食積步數擯介

皆降殺備於大行人掌客其進退揖讓之儀則一與公同

諸公之臣相爲國客

正義鄭氏康成曰謂相聘也

則三積皆三辭拜受

正義鄭氏康成曰受者受之於庭也

賈疏此謂在道之禮於路館致

之亦以束帛上諸公云登此不言登故知受之於庭

侯伯之臣不致積

賈疏侯伯之臣

不致積但不以束帛致之非於道全無積也

王氏昭禹曰臣下其君之

禮二等故三積

王氏應電曰大國之卿當小國之

君故積與子男同皆有束帛致之三辭而後受無問

禮殺於諸侯也

案王氏詳說謂有積無問異於國君以下經問君大
夫則問聘者亦在其中非也大行人掌客職之問承
饗食饗餼之問而問以脩脯也此職下經所謂問則
對聘使而問君大夫無恙混爲一事可乎

及大夫郊勞旅擯三辭拜辱三讓登聽命下拜登受賓

使者如初之儀及退拜送

賓依注
作僎

正義易氏被曰諸公先再勞而後主君郊勞若諸公
之臣使大夫勞之於近郊而已主君郊勞則交擯大

夫郊勞僅旅擯而已 賈氏公彥曰賓使各陳七介

鄭氏康成曰登聽命賓登堂也賓當為儐勞用束

帛儐用束錦侯伯之臣受勞於庭

王氏詳說曰案聘禮賓揖至門內勞

者致命是不受勞於堂也侯伯之臣如此子男可知矣

案使者亦三辭而後拜受也

通論黃氏度曰案諸公相爲賓敵則交擯不敵則旅
擯大夫雖敵亦旅擯不敢擬於君也

致館如初之儀

正義鄭氏康成曰如郊勞也不儻耳侯伯之臣致館

於庭

賈疏案聘禮卿致館無束帛賓亦無儻知此亦然侯伯之臣致館於庭者亦案聘禮知之不

言致飧者君於聘大夫不致飧也聘禮記曰飧不致

賓不拜

案聘禮宰夫設飧不言致不使大夫以束帛致命也

賈氏公彥曰案

聘禮賓至使大夫帥至館卿乃致館

及將幣旅擯三辭拜逆客辟三揖每門止一相及廟唯

君相入三讓客登拜客三辟授幣下出每事如初之儀

辟音避相

悉亮反

正義賈氏公彥曰將幣亦謂圭璋也旅擯三辭亦於大門外主君陳五擯客陳七介不傳辭也此三辭辭其主君以大客禮當已也拜逆者三辭訖主君遣上擯納客客入大門主君在大門內南面拜拜客奉君命屈辱來見已客辟者奉君命來不敢當拜故辟也三揖者亦揖之使前也三讓客登不言三揖而後至階文不具也客登主君與客俱登據客而言也授幣者授玉與主君也鄭氏康成曰客辟逡巡不答拜

也惟君相入客臣也相不入矣拜主君拜客至也

賈疏

主君於阼階上北面拜客至此堂并拜受幣

客三辟三退負序也

賈疏聘禮文

每事享及有言

王氏昭禹曰亦與諸公拜送幣之後言每事如初同

易氏祓

曰客辟不敢當主君也不敢拜送幣者亦不敢當主

君也 王氏詳說曰案聘義君拜逆於大門之外而

廟受北面拜貺拜君命之辱是拜聘君也非拜使者也故拜逆拜受拜問君皆辟而不答拜

案聘禮公皮弁迎賓于大門內賓入門左公再拜賓

辟不答拜即此拜逆客辟也公揖入每門每曲揖此以三揖約之也及廟門公揖入立于中庭賓執圭入門左三揖至于階三讓即此三讓也公升二等賓升西階西東面致命公當楣再拜賓三退負序即此客登拜客三辟也公受玉于中堂與東楹之間賓降出即此授幣下出也不敢拜送幣者奉君命以將事不敢當君也故私面私獻皆再拜稽首

及禮私面私獻皆再拜稽首君答拜

正義鄭氏康成曰禮以醴禮客

賈疏案聘禮禮客用醴齊異於君鬱鬯

私面私覲也

賈疏聘禮賓奉束錦請覲

既覲則或有私獻者

賈疏聘禮

記既覲賓若私獻奉獻將命

鄭司農云春秋傳楚公子棄疾見鄭

伯以其乘馬私面

賈疏昭六年左傳

賈氏公彥曰此三者

皆於聘之日行之故并言之君答拜者見異國之臣當空首拜也

案王氏詳說謂私覲私面之幣皆已物而以聘禮證之非也內府職凡適四方使者共其所受之物而奉

之校人職凡國之使者共其幣馬則凡幣物皆官給之明矣卽以聘禮言之宰書幣命宰夫官具特言官者正以明私覲私面之幣物皆官給耳既返國使者公幣私幣皆陳上介陳公幣羣介不陳蓋使者卿也故陳之以示體國之義得君命而後以私幣歸上介已下則不敢徧陳以煩君之命耳乃用此以爲私覲私面幣皆已物之徵則義淺狹而不可通矣

通論呂氏曰聘禮賓卒聘事奉束錦乘馬請覲所謂

私覲也賓朝服問卿既致命出賓面如覲幣所謂私面也蓋列而言之則見君曰覲見卿曰面離而言之則面即覲亦可爲見君如春秋傳楚公子棄疾見鄭伯以乘馬八匹私面於君是也

出及中門之外問君客再拜對君拜客辟而對君問大夫客對君勞客客再拜稽首君答拜客趨辟

辟音避下同勞力報

反下同

正義鄭氏康成曰中門之外即大門之內也

賈疏聘禮及大

門內公問君

問君曰君不恙乎

賈疏爾雅恙憂也

對曰使臣之來

寡君命臣於庭問大夫曰二三子不恙乎對曰寡君

命使臣於庭二三子皆在勞客曰道路悠遠客甚勞

勞介則曰二三子甚勞

賈疏問君曰已下未知所出或云孔子聘問之辭亦無徵

問君客再拜對者爲敬慎也

賈氏公彥曰聘享訖

乃始行私相慰問之事是以聘禮注云以公禮將事

時無由問也

敖氏繼公曰及大門內客東面君西

面而問之是時上擯往來傳命承擯紹擯亦負東塾

致饗餼如勞之禮饗食還圭如將幣之儀

正義鄭氏康成曰饗食亦謂君不親而使大夫以幣致之賈氏公彥曰饗食與還圭共文故知使大夫致之如將幣者蓋不盡如之所如者如旅擯主人皮弁賓皮弁襲與將幣同自餘則別聘禮君使卿皮弁還玉於館是與將幣別者也

案饗食還圭蓋有親不親兩灋公食大夫禮公迎賓拜至此與將幣同也饗禮亦然可知意還圭亦有公

親之者但聘禮未備載耳君親還圭客亦當三辭拜辱揖讓而升堂與使卿還圭者不同矣然則司儀與聘禮一親一不親固可互備也卿還圭客主兩不拜若大夫致饗食恐無竟不拜之禮其間儀節要不盡同此經言如將幣之儀亦大槩之辭而所如者當不止於疏所云也

君館客客辟介受命遂送客從拜辱于朝

辟音避

正義鄭氏康成曰君館客者客將去就省之盡殷勤

也遂送君拜以送客

賈疏聘禮云聘享夫人之聘享問大夫送賓公皆再拜是君拜

之事也

敖氏繼公曰館者就其館之稱也君館客將

致四者之拜也此禮在還圭之明日是時君蓋朝服而立於賓館之外門外東鄉接西塾客辟者不敢辭不敢見若隱辟然故云辟此辟字與上文所云者異君於聘享夫人之聘享問大夫皆拜者拜君命之辱也

案聘禮注云爲賓將去公親存送之且謝聘君之意

也上介西面受命擯者每贊君辭則曰敢不承命告于寡君之老客從拜辱于朝拜主君之館已也

明日客拜禮賜遂行如入之積

正義鄭氏康成曰禮賜謂乘禽君之加惠也

賈疏聘禮賓三

拜乘禽於朝

如入之積則三積從來至去

案乘禽日日受賜故於將去總拜之以明雖小亦識也諸公相爲賓拜饗饗食之大禮而不拜其小禮卿則饗饗食皆旋拜之已勤矣而又拜其小此尊卑疏

密之差也

凡侯伯子男之臣以其國之爵相爲客而相禮其儀亦

如之

相竝如字

正義鄭氏康成曰爵謂卿也大夫也士也 李氏嘉

會曰以爵相爲客足矣國有大小子男之卿僅可當

公國之士故必以國之爵言也 鄭氏鍔曰禮之各

以其爵命其儀與辭則與公之臣同

凡四方之賓客禮儀辭命餼牢賜獻以二等從其爵而

上下之

正義鄭氏康成曰上下猶豐殺 賈氏公彥曰二等

謂降殺以兩

案上經言同等之國君相朝及使卿相聘之禮而未
及大小之國相朝相聘者故統舉四方之賓客而以
從其爵而上下包之

凡賓客送逆同禮

正義鄭氏康成曰謂郊勞郊送之屬 王氏應電曰

不豐前而嗇後不敬始而怠終禮也

凡諸侯之交各稱其邦而爲之幣以其幣爲之禮

稱尺證反

正義鄭氏康成曰幣享幣也於大國則豐於小國則殺主國禮之如其豐殺謂賄用束紡禮用玉帛乘皮

及贈之屬

賈疏聘禮還玉之下云賓迎大夫賄用束紡注云所以遺聘君又云禮玉束帛乘皮

注云禮禮聘君所以報享也又云遂行舍于郊公使卿贈如覲幣又記云賄在聘為賄是其豐殺多少者也

凡行人之儀不朝不夕不正其主面亦不背客

朝如字

正義鄭氏康成曰謂擯相傳辭時也不正東鄉不正

西鄉

易氏祓曰日出為朝朝東也日入為夕夕西也

常視賓主之前卻得兩

鄉之而已 賈氏公彥曰此經論司儀為擯相之法

鄭氏鏐曰主南面不正其主面謂不正如君南面也客答君而北面不背客謂亦不正鄉北也

通論王氏應麟曰儀之別雖至於九其總不過乎五又約而言之則三而已故典命之叙諸侯曰五儀諸臣曰五命而孟子王制之序爵皆五等即武成之列

爵惟五也司服有公之服侯伯之服子男之服掌客
有公之禮侯伯之禮子男之禮行人敘諸伯則曰如
諸侯男則曰如諸子而司儀贊見亦爲壇三成序揖
皆三等即武成之分土惟三也儀以九爲數故詳而
難紊儀以三爲等故簡而易明 王氏安石曰邦國
之君臣相爲賓客先王設官以掌其禮問勞贈送物
爲之數拜揖辭受事爲之節此邦國之君臣所以相
親也觀春秋之時一言之不讐一揖之不中而兩國

因之起釁則周官之圖民禍患豈爲不豫哉

行夫掌邦國傳遽之小事媼惡而無禮者

傳張戀反
遽其豫反

正義鄭氏康成曰傳遽若今時乘傳騎驛而使者也
媼福慶也惡喪荒也此事之小者無禮行夫主使之
賈氏公彥曰無擯介而單行謂之無禮

案傳遽者以其從者少也云媼惡者如玉小有問勞
雖媼而不得謂之賀慶小有弔慰雖惡而不得謂之
憂凶致命自有幣禮動不虛故也但無皮馬等物耳

凡其使也必以旌節雖道有難而不時必達

使色吏反難乃旦反

正義鄭氏康成曰道有難謂遭疾病他故不以時至也必達王命不可廢也其大者有禮大小行人使之有故則介傳命不嫌不達

居于其國則掌行人之勞辱事焉使則介之

注故書曰夷使夷發

聲

正義鄭氏康成曰使謂大小行人

案居於其國謂居王國而非出使時也五服君臣以

朝聘至者行人勞辱之事甚多皆行夫掌之以其爲
行人中之下士官卑且員多也司隸職國有賓客則
役其煩役之事然則諸隸受役行夫令之矣行人有
使事則爲之介亦尊卑副貳之差也

環人掌送逆邦國之通賓客以路節達諸四方

正義鄭氏康成曰通賓客以常事往來者也路節旌

節也四方畿上

賈疏畿上者出畿則入諸侯國諸侯國自有通之者

王氏安

石曰通賓客謂諸侯賓客取道往來者

舍則授館令聚櫟有任器則令環之

正義賈氏公彥曰館謂道上廬宿市所館舍任器謂

賓客任用之器

鄭氏康成曰令令野廬氏

賈疏野廬氏若

有賓客則令守涂地之人聚櫟之

鄭司農云四方人有任器者則環

人主令殉環守之

王氏曰國野之道五十里有候

館環人主授之

凡門關無幾送逆及疆

正義鄭氏康成曰環人送逆之則賓客出入不見幾

通論王氏應電曰地官以懷賓客爲職故遺人之官所以養之之道備秋官以詰姦慝爲職故野廬之官所以衛之之法嚴然無統一之者大行人主賓於四門故特設環人之官兼此二事

案逆賓於疆及宿令櫟歸送亦如之掌訝之職也而又設環人者所以待過賓之道經王畿而之列國者故曰通賓客又曰以路節達諸四方又曰門關無幾送逆及疆則非止而有事者明矣曰環人者環四境

而待過賓以達之於四方也

象胥掌蠻夷閩貊戎狄之國使掌傳王之言而諭說焉

以和親之

閩迷巾反
使色吏反

正義鄭氏康成曰謂蕃國之臣來頻聘者

賈疏以中國頻聘之

禮況之其實蕃國
之臣無聘類法

若以時入賓則協其禮與其辭言傳之凡其出入送逆

之禮節幣帛辭命而賓相之

賓相之賓音損下
同相悉亮反下同

正義鄭氏康成曰以時入賓謂其君以世一見來朝

爲賓者自來至去皆爲擯而相侑其禮儀 郎氏兆
玉曰其拜跪坐起不同於中國則教之以中國之儀
而協其禮其言語聲音不同於中國則譯外國之音
而傳其語 王氏應電曰主於夷則非王朝之禮主
於華則夷人不能行故和協其所當行之禮與其所
以奉上之辭而譯傳之至於出入王國送逆有禮節
賜予有幣帛誥諭有辭令彼受之不可以無禮於是
擯相之以存中國之體

凡國之大喪詔相國客之禮儀而正其位

正義鄭氏康成曰客謂諸侯使臣來弔者

賈疏若王喪諸侯皆

來此蓋謂王后世子也

郎氏兆玉曰相其哀臨之儀正其坐

立之位

案此下三節皆小行人錯簡

黃氏度云然

蓋貳之職事常

與正相差大喪大行人詔相諸侯之禮則詔相國客必小行人也凡諸侯之王事大行人辨其位正其等協其禮賓而見之則軍旅會同受國客幣而賓禮之

必小行人也小行人掌邦國賓客之禮籍辨別等威最明故作事亦屬之乃得人與事稱也

凡軍旅會同受國客幣而賓禮之

正義鄭氏康成曰謂諸侯以王有軍旅之事使臣奉幣來問

案此謂王有軍旅會同之事而諸侯不從者王或在京師或在畿外諸侯各使卿大夫勞問於王所則受其幣而賓禮之

凡作事王之大事諸侯次事卿次事大夫次事上士下事庶子

正義鄭氏康成曰作使也鄭司農云王之大事諸侯使諸侯執大事也次事卿使卿執其次事也次事使大夫次事使上士

賈疏王之三等之士皆以上士總之

下事使庶子

案作事承上軍旅會同而言當軍旅會同時王或有調遣進止更改約束之事則隨其事之大小而分別作之

掌客掌四方賓客之牢禮餼獻飲食之等數與其政治

治直

吏反

正義易氏祓曰牢禮即凡用牢之禮餼謂餼九牢之類獻謂禽獻之類飲食謂饗燕膳食之類 鄭氏鶚

曰等如司儀所謂以二等從其爵而上下之數即下

文所陳之數 鄭氏康成曰政治如國新殺禮之類

王合諸侯而饗禮則具十有二牢庶具百物備諸侯長

十有再獻

長知
丈反

正義鄭氏康成曰饗諸侯而用王禮之數者以公侯
伯子男盡在是兼饗之莫敵用也

案敵當作適

存疑鄭氏康成曰諸侯長謂九命作伯者也獻公侯
以下如其命數

案此會同既畢而饗諸侯以五等咸在故併饗之十
有再獻者九獻爲正三獻爲加猶正鼎九陪鼎三也
注謂獻如其命數若然恐窮日不給矣此長字如燕
禮大夫長升受旅之長謂尊先卑後而次第獻之也

羣侯雖多以十二獻統之畢則已十二牢者亦以羣
侯多不可徧陳故總用十二牢以此爲人人受獻人
人有牢也經云而又云則蓋亦有不饗時以其事有
緩急時有久暫故不一律也饗當在廟近國則入國
即國外亦當於有廟之所行之傳所謂邑有先君之
廟曰都者可也於司儀言燕於掌客言饗者牢禮飲
獻之數掌客所司也不見食禮者食禮不可以衆舉
故合諸侯則無之

王巡守殷國則國君膳以牲犢令百官百姓皆具從者
三公眡上公之禮卿眡侯伯之禮大夫眡子男之禮士
眡諸侯之卿禮庶子壹眡其大夫之禮

從才
用反

正義鄭氏康成曰國君者王所過之國君也犢繭栗
之犢也以膳天子貴誠也牲孕天子不食也祭帝不
用也凡賓客則皆角尺令者掌客令主國也百姓皆
具言無有不具備 王氏應電曰王之三公出封爲
上公卿出封爲侯伯大夫出封爲子男上士三命而

諸侯之卿亦三命故待之皆眡其禮惟庶子壹眡諸侯大夫之禮則以爲客而稍加也

案羣儒多不用注義謂王至方嶽而合諸侯主國始共具蓋以涂所經過令百官百姓皆具疑太煩擾耳不知王巡守而過諸侯之國都自當舍其祖廟即經其四鄙惟帷宮旌幕王官可自具耳飡牽委積不以令守國者將焉取之且名曰百姓然牛羊豕而外亦不過魚腊乘禽及陸產水物合之爲百品耳周語鄰

使過賓百官各以物至況王巡守君親監之百官尚有不各共其職事者乎凡此類乃好以私意小知妄立異說而不求之事理之實也

凡諸侯之禮

正義賈氏公彥曰此以下並是諸侯自相朝主國待

賓之禮

鄭氏鈔曰此文有夫人致禮之事則知爲諸侯待賓之禮無疑

若然天子

掌客不見天子待諸侯禮而見諸侯自相待者以外

包內也

上公五積皆眡飧牽

積子賜反下同

正義鄭氏康成曰積皆眡飧牽謂所共如飧而牽牲

以往不殺也不殺則無鉶鼎

賈疏鉶鼎即陪鼎

簋簋之實其

米實於筐豆實實於甕其設筐陳於楹內甕陳於楹

外牢陳於門西車米禾薪芻陳於門外壺之有無未

聞

賈疏皆約公食大夫禮解之

案積用飧之牢以爲禮也生而致之一夕遷次不盡用也始至則飧孰腥並陳嗣致饗餼飧牽並陳固是

禮有大小亦順事之宜以適賓耳 司儀職既詳相
為賓之儀而此職第言上公五積侯伯四積子男三
積牢禮餼獻飲食皆以爵等為之數而不辨致禮者
為王朝為鄰國則上下同之明矣

三問皆脩羣介行人宰史皆有牢

羣介以下九字依注作文誤當衍

正義鄭氏康成曰脩脯也上公三問皆脩下云羣介
行人宰史皆有牢君用脩而臣有牢非禮也蓋誤衍
耳

食五牢食四十簋十豆四十鉶四十有二壺四十鼎簋

十有二牲三十有六皆陳

銅音刑下同四十有二當作三十有八牲當作腥

正義鄭氏康成曰食客始至致小禮也

賈疏對饗公餼為大禮

侯伯子男飧皆飪一牢其餘牢則腥

賈疏腥之數備於下

食者

其庶羞美可食者也其設蓋陳於楹外東西不過四

列

賈疏所陳皆約公食大夫致食之禮案公食若不親食庶羞陳於碑內以堂上有豆實簋實無容庶

羞處也設食之時楹外既空不須向堂下碑內故疑在楹外陳之十以為列故四列也

簋稻粱

器也公十簋堂上六西夾東夾各二也

賈疏約聘禮致饗餼東西

夾各二以外
置於堂上

豆菹醢器也公四十豆堂上十六西夾

東夾各十二禮器曰天子之豆二十有六諸公十有

六諸侯十有二以聘禮差之則堂上之數與此同

賈疏

聘禮致饗餼於上大夫八豆下大夫六豆竝是堂上
豆數禮器豆數亦是堂上所陳可知餘者分之於東

西夾
也 銅羹器也

賈疏銅器名所以盛
腳臚臚三等之羹

禮之大數銅少

於豆公銅四十二推其差數宜爲三十八

賈疏侯伯
子男皆銅

少豆多子男十八侯伯二十八以十為降
殺故知此四十二宜為三十八是其衰也

堂上十八

西夾東夾各十

賈疏亦約聘禮
致饗餼而言

壺酒器也其設於堂

夾如豆之數

賈疏亦約聘禮但此壺與豆數同故知設於堂夾如豆數也

鼎牲器

也簋黍稷器也鼎十有二者飪一牢正鼎九與陪鼎

三皆設於西階前

賈疏牢鼎九謂牛羊豕魚腊膚與腸胃鮮魚鮮腊陪鼎三者腳臠肫

也聘禮鼎設於西階前陪鼎當內廉王氏詳說曰所謂陪鼎者卽鉶羹之鼎也羹孰於鼎而載之於器

所以既言簋十二者堂上八西夾東夾各二

賈疏亦

鼎又言鉶知合言鼎簋者牲與黍稷俱食之主也

賈疏黍稷與衆饌為主牲

與羞物為主是俱得為食之主也聘禮致饗餼二十簋彼臣多此君少者禮有損之而益故也

王氏昭

禹曰牲天產以養精黍稷地產以養形二者相資以為養食之主也牲當爲腥聲之誤

也腥謂腥鼎也於侯伯云腥二十有七其故腥字也

案侯伯腥字是則公與子男牲字竝誤無疑

諸侯禮盛腥鼎有鮮魚鮮腊

每牢皆九爲列設於阼階前

賈疏聘禮設飧飪一牢在西鼎九羞鼎三腥一

牢在東鼎七致饗餼則腥二牢鼎二七無鮮魚鮮腊設於阼階前西面南陳如飪鼎二列此云三十六故知有鮮魚鮮腊也公腥鼎三十六腥四牢也皆陳陳列也飧

門內之實備於此矣

賈疏見門內既備仍有車米之等在門外

亦有車米

禾芻薪公飧五牢米二十車禾三十車芻薪皆倍其

禾

賈疏此約饗餼死牢而言上公死牢五明米禾合五十車芻薪皆倍其禾亦同饗餼禮鄭氏錡曰

已上所致飧之物皆列於客館也食陳於楹外盞與豆銅壺盞皆陳於堂上及東西之夾鼎則陳於西階之前腥則陳於阼階之前凡此皆謂之門內之實車米禾芻薪之類列於門外

饗餼九牢其死牢如飧之陳牽四牢米百有二十筥醢醢百有二十甔車皆陳車米眡生牢牢十車車三秬芻薪倍禾皆陳

車皆陳之車字

行文甔鳥弄反藪素口反秬丁故反或宅加反

正義鄭氏康成曰饗餼既相見致大禮也大者既兼飧積有生有腥有熟餘又多也

賈疏死牢五是兼飧牽四牢言兼積積當

五牢是兼不盡以牽與積同故云兼之

死牢如飧之陳亦飪一牢在西

餘腥在東也

賈疏約聘禮知之

牽生牢也陳於門西如積也

賈疏亦橫陳於門西而東上

米橫陳於中庭十爲列每筥半斛公

侯伯子男黍梁稻皆二行公稷六行侯伯稷四行子

男稷二行

賈疏約聘禮致饗餼法彼云米百筥筥半斛設於中庭十以爲列北上黍梁稻皆二

行稷四行此但增稷餘不增故知三等行數然也

醢醢夾碑從陳亦十爲列

醢在碑東醢在碑西

賈疏聘禮注云夾碑在庭之中央醢在東醢穀陽也醢在西醢

肉陰也言夾碑故知從陳

皆陳於門內者於公門內陳之也言車

者衍字耳車米載米之車也聘禮曰十斗曰斛十六

斗曰藪十藪曰秉每車秉有五藪則二十四斛也禾

豪實并刈者也聘禮曰四秉曰筥十筥曰稷十稷曰

秬每車三秬則三十稷也稷猶束也米禾之秉筥字

同數異禾之秉手把耳筥讀為棟梠之梠謂一穊也

皆陳橫陳門外者也米在門東禾在門西

賈疏皆約聘禮致饗

籩芻薪雖取數於禾薪從米芻從禾也

王氏昭禹曰車米祇生牢

牢十車牽四牢則車米四十車也車禾祇死牢牢十車死牢如飧之陳則車禾五十車也芻薪倍禾則百

也車

賈氏公彥曰上公醯醢百二十饔與王舉百二十饔同故鄭志云此公乃二王後若王之上公當與侯伯俱同百饔王氏應電曰筮米陳於中庭以備貴者之食若車米則陳於門外賤者之食也

乘禽日九十雙殷膳大牢以及歸

乘繩證反下同

正義鄭氏康成曰乘禽乘行羣處之禽謂雉鴈之屬

賈疏兼有鷩鷩之等故云之屬

於禮以雙爲數殷中也中又致膳示

念賓也

賈疏牢禮之外於賓中間未去又致此膳所以示念賓之意無倦也

三饗三食三燕若弗酌則以幣致之

食音嗣下同

正義鄭氏康成曰若弗酌謂君有故不親饗食燕也不饗則以酬幣致之不食則以侑幣致之

案大行人惟言饗食司儀及掌客始兼言燕者大行人掌大賓之禮及大客之儀以親諸侯惟饗食為待諸侯之正禮燕則王所以親公卿大夫而兼用於羣侯司儀通掌九儀掌客專掌四方賓客之共具則於燕不得獨遺矣注引聘禮不過證以幣致耳賈氏

遂謂饗食嚴而燕褻故無幣致之禮覲禮疏又云燕亦以幣致自相牴牾聘禮所以不言燕者蓋饗燕皆有酬幣言饗幣則燕如之耳

凡介行人宰史皆有飧饔餼以其爵等為之牢禮之陳數惟上介有禽獻

正義鄭氏康成曰凡介行人宰史衆臣從賓者也行人主禮宰主具史主書皆有飧饔餼尊其君以及其臣也以其爵等為之牢禮之陳數爵卿也則飧二牢

饗餼五牢大夫也則飧大牢饗餼三牢士也則飧少

牢饗餼大牢

賈疏皆約聘禮賓卿上介大夫士介四人歸饗餼降殺而言

此降小

禮豐大禮也

賈疏小禮謂飧及乘禽之等去君遠大禮謂饗餼卿五牢子男卿與君等是豐

大禮也

以命數則參差難等略於臣用爵而已 鄭氏

齔曰上介相禮其爵亦尊宜有禮賜以示優厚故亦

用禽獻聘禮乘禽於客日如其饗餼之數士中日則

二雙是也

案士是衆介非上介聘禮士亦有乘禽二經微有異同

夫人致禮八壺八豆八簋膳大牢致饗大牢食大牢

正義鄭氏康成曰夫人致禮助君養賓也籩豆陳於

戶東壺陳於東序

賈疏約聘禮夫人使下大夫韋弁歸禮知之

凡夫人之

禮皆使下大夫致之

賈疏內宰致后賓客之禮內宰是下大夫王后尚使下大夫况

諸侯乎

卿皆見以羔膳大牢

見賢遍反下同

正義鄭氏康成曰卿皆見者見於賓也既獻之又膳

之亦所以助君養賓

賈疏言亦者亦夫人也

侯伯四積皆視飧牽再問皆脩飧四牢食三十有二簋

八豆三十有二鉶二十有八壺三十有二鼎簋十有二
腥二十有七皆陳饗餼七牢其死牢如飧之陳牽三牢
米百筥醯醢百甕皆陳米三十車禾四十車芻薪倍禾
皆陳乘禽日七十雙殷膳大牢三饗再食再燕凡介行
人宰史皆有飧饗餼以其爵等為之禮惟上介有禽獻
夫人致禮八壺八豆八籩膳大牢致饗大牢卿皆見以
羔膳特牛

正義鄭氏康成曰侯伯八簋堂上四西夾東夾各二

豆三十二堂上十二西夾東夾各十鉶二十八堂上
十二西夾東夾各八腥鼎二十七腥三牢也每牢皆
九為列

子男三積皆視飧牽壹問以脩飧三牢食二十有四簋
六豆二十有四鉶十有八壺二十有四鼎簋十有二牲
十有八皆陳饗餼五牢其死牢如飧之陳牽二牢米八
十筮醢醢八十蠶皆陳米二十車禾三十車芻薪倍禾
皆陳乘禽日五十雙壹饗壹食壹燕凡介行人宰史皆

有飧饗餼以其爵等爲之禮惟上介有禽獻夫人致禮

六壺六豆六簋膳視致饗親見卿皆膳特牛

牲當作腥

正義鄭氏康成曰子男六簋堂上二西夾東夾各二豆二十四堂上十二西夾東夾各六鉶十有八堂上十西夾東夾各四牲亦當作腥腥鼎十八腥二牢也

膳視致饗言夫人致膳於小國之君以致饗之禮則是不復饗也饗有壺酒

賈疏致親見卿見讀如卿皆膳無酒

見之見

賈疏明此亦是卿見朝君非謂朝君來見卿也

言卿於小國之君有

不故造館見者造館見者乃致膳 王氏昭禹曰夫
人致禮於侯伯不言食大牢則不致食也於子男膳
祇致饗則并不致饗也 賈氏公彥曰聘禮士介四
人米百筥數多於子男與侯伯等者彼乃臣法自爲
一禮不與相差亦是損之而益也

通論易氏祓曰鼎牲器也簋黍稷器也公侯伯子男
皆十有二而無所降殺者以牲與黍稷爲食之主也
凡諸侯之卿大夫士爲國客則如其介之禮以待之

正義鄭氏康成曰言其特來聘問待之之禮如其爲

介時

賈疏前文云介行人宰史是從君之法此言不從君而特來聘問者亦依爵等待之如其爲介

時

凡禮賓客國新殺禮凶荒殺禮札喪殺禮禍裁殺禮在

野在外殺禮

殺所界反

正義鄭氏康成曰皆爲國省用愛費也國新新建國

也凶荒無年也禍裁新有兵寇水火也王氏應電

曰凶荒宜賙委札喪宜賻補禍裁宜哀弔鄰國當分

裁恤患在野謂行禮於郊在外謂兩君相遇於途亦不能備物故皆殺禮 易氏被曰大荒大札天地有裁王皆為之不舉所以為內省自疚之道至矣於是數者而殺禮抑亦以其自處者而待賓客也 賈氏公彥曰在野在外息遽禮物不可卒備故亦殺之凡賓客死致禮以喪用

正義鄭氏康成曰死則主人為之具而殯矣喪用者

饋奠之物

賈疏如小斂特豚一鼎大斂時特豚三鼎之類是也

賓客有喪惟芻稍之受

稍所教反

正義鄭氏康成曰喪謂父母死也客則又有君焉芻

給牛馬稍人廩也其正禮飧饔餼主人致之則受

賈疏

若饗食加之亦不受也

遭主國之喪不受饗食受牲禮

牲當依注作脰

正義鄭氏康成曰不受饗食饗食加也牲亦當為脰

聲之誤也有喪不忍煎亨正禮飧饔餼當孰者脰致

之

賈疏案聘禮聘遭喪入境則遂主人畢歸禮賓惟饗餼之受注云受正不受加

掌訝掌邦國之等籍以待賓客

訝誤
化反

正義鄭氏康成曰等九儀之差數

賈疏即大行人命
者五爵者四是也

王氏應電曰邦國之等籍必使掌訝掌之者蓋賓客初至於境即用其等之禮以待之

若將有國賓客至則戒官脩委積與士逆賓于疆為前

驅而入

積子賜
反下同

正義鄭氏康成曰官謂牛人羊人舍人委人之屬

賈疏

委積有牛羊豕米禾芻薪
故知所戒謂牛人以下

士訝士也既戒乃出迎賓

王氏昭禹曰知為訝士者以訝士與行人
送迎賓客入於國則為之前驅而辟故也

案必與訝士俱以設有暴客者可即時詰搏且訝士
掌侯國之獄訟既入王畿即賓客之從者或有鬪爭
亦不敢專治而歸於訝士也

及宿則令聚櫟及委則致積

正義鄭氏康成曰令令野廬氏

賈疏野廬氏職有賓客令其地之民聚櫟

之致積以王命致於賓 王氏應電曰此皆賓在郊
外之事

案國賓客將至往逆時已關於野廬氏矣及身經其地又申令守涂地之人使聚櫟耳應致積之地其積早委焉掌訝逆賓於疆為前驅而入則隨地可致故以屬之

至于國賓入館次于舍門外待事于客

正義鄭氏康成曰次如今官府門外更衣處待事于客通其所求索

及將幣為前驅至于朝詔其位入復及退亦如之

正義鄭氏康成曰前驅道之以如朝

賈疏朝即大門外陳擯介之處

鄭司農云詔其位告客以其位次也某謂入復者入告王以客至也退亦如之如其為前驅

凡賓客之治令訝訝治之

治直吏反

案賓客之治謂賓客有事於王朝與王朝之公卿大夫士一切往來之禮皆是也賓客以令掌訝則掌訝治之言此以包上文所未備耳注以治為正其貢賦理國事則濶遠而不近於事情或以所令者為訝士

掌訝與訝士爵均也奚以相令爲哉

凡從者出則使人道之

從才用反

正義鄭氏康成曰從者凡介以下也人其屬胥徒也使道賓客之從者營護之

及歸送亦如之

正義鄭氏康成曰如之者送至於竟如其前驅聚櫟待事之屬

凡賓客諸侯有卿訝卿有大夫訝大夫有士訝士皆有

訝

正義鄭氏康成曰此謂朝覲聘問之日王所使迎賓

客於館之訝

賈疏聘禮記卿大夫訝大夫士訝士皆有訝

王氏應電曰

凡賓客掌訝既迎之矣訝士復相之矣而又有所謂訝何也蓋掌訝訝士其爵皆中士位既卑不敢與尊者為禮但任驅使奔走之勞而已故諸侯則以卿卿以大夫大夫以士士皆有訝然後為訝之正也

案士皆有訝不言訝之之人者士多則訝者不定也

司士職會同賓客作士從諸子職會同賓客作羣子
從則訝列國之士者其諸王朝未命之士庶子與

凡訝者賓客至而往詔相其事而掌其治令

相悉亮反

正義王氏應電曰治令主國所以待賓客之治而有
所徵令也此非掌訝之職以其同爲訝故附載於此
案凡訝者謂上所云卿大夫士皆待賓至而後往非
若掌訝之逆于疆也掌訝唯至于朝詔其位而已此
訝者則詔相其禮事掌訝及退為之前驅而已若賓

有治王有令於賓則此訝者通掌之

掌交掌以節與幣巡邦國之諸侯及其萬民之所聚者
道王之德意志慮使咸知王之好惡辟行之

好呼報反
下同惡烏

路反辟
音避

正義鄭氏康成曰節以為行信幣以見諸侯也咸皆
也辟讀如辟忌之辟使皆知王之所好者而行之知
王之所惡者辟而不為 易氏拔曰王之志慮出於
德意則無偏好無偏惡可知已 王氏志長曰觀掌

交職使咸知王之好惡辟行之而知王之好惡不可
以不慎也王之好惡在深宮曲房顰笑寢興之際而
諸侯之貞邪生民之休戚風俗之污隆係於此矣後
世名法之家乃務隱其好惡示人以不測上深中而
多數下飾貌而匿情三代之治所以不可復追也

案萬民所聚謂其國之大都會也四海九州山陬海
濱掌交何能徧至惟於民聚之地道王之德意然後
可樹之風聲播傳幽隱

使和諸侯之好達萬民之說

說如字
注音悅

正義鄭氏康成曰諸侯有欲相與修好者則為和合之說所喜也達者達之於王若其國君 項氏安世曰和諸侯之好使無猜疑怨忌之隙達萬民之說使無抑鬱憤怨之情

案說論說也蓋或自言其利害或議政事之得失有不能達於王及國君者皆為達之是之謂士傳言

掌邦國之通事而結其交好以諭九稅之利九禮之親

九牧之維九禁之難九戎之威

難乃旦反

正義鄭氏康成曰諭告曉也九稅所稅民九職也

鄭氏

鐔曰諭以九稅之利使用九職任民而取其利

九禮九儀之禮

鄭氏鐔曰諭以九禮之親

使遵九儀之禮以相聘問而致其親

九牧九州之牧

鄭氏鐔曰諭以九牧之維使依九州

之牧以相親比

九禁九法之禁

鄭氏鐔曰諭以九禁之難使知司馬九法以禁邦國者不

可九戎九伐之戎

鄭氏鐔曰諭以九戎之威使知司馬九伐之法以威邦國者為可畏

王氏安石曰言九禁又言九戎者方其制軍詰禁

則為九禁及致討伐則為九戎

王氏應電曰掌交

專掌邦國之通事使無往而不來來而不往兼諭以九稅已下五者此上下之交所以固結而不可解

案注通事謂朝覲聘問非也朝覲聘問禮有常經無為別設官以掌之蓋非朝聘之期而鄰國有事欲相通則因王官之巡行而達其意也其事如通防交糴聯婚姻詰逋逃之類

掌察

闕

掌貨賄

闕

朝大夫掌都家之國治

正義鄭氏康成曰都家王子弟公卿及大夫之采地也主其國治者平理其來文書於朝者黃氏度曰國治王國之治都家當奉行者冢宰職以八則治都鄙

日朝以聽國事故以告其君長

長知
文反

正義王氏昭禹曰所作謂之事所遭謂之故鄭氏康成曰告於君長使知而行之也

案君長即謂其公孤卿大夫注以君為國君非也

國有政令則令其朝大夫

正義鄭氏康成曰使以告其都家之吏

案上文國事故乃天子日所施為者聽之以告其君
長使知王之所好惡辟行之也此政令方是施於都
家者

凡都家之治于國者必因其朝大夫然後聽之惟大事
弗因

正義鄭氏康成曰謂以小事文書來者朝大夫先平
理之乃以告有司也大事者非朝大夫所能平理
鄭氏鍔曰事之大者其君長當自至而稟王命王
氏應電曰常事不因於朝大夫則事無統理而王國
不勝其勞大事不聽其君長之自達則恐有未當而
都家不免於壅蔽故小治因之而大事則弗因也
案方士職曰凡都家之士所上治則主之則此職所
謂治乃請事而非獄訟可知矣此職曰治于國則掌

訝職凡賓客之治令訝訝治之乃治賓客之從者與
邦人之爭訟而非賓客以事請可知矣

凡都家之治有不及者則誅其朝大夫在軍旅則誅其
有司

正義鄭氏康成曰不及謂有稽殿之

賈疏不能催促

有司都

司馬家司馬 賈氏公彥曰言誅有司者見軍旅不

干朝大夫之事 王氏應電曰責有所歸則事治誅

有司而不及其君長所以全親親貴貴之道也

都則闕

都士闕

家士闕

通論王氏應電曰王畿千里公邑之外為家邑家邑之外為小都大都封其子若弟公卿大夫錯居而統領之非若諸侯之世國而私其地也故設王官以馭之祭祀名器禮之大經也於是有都宗人家宗人軍旅國之大柄也於是有都司馬家司馬法則者馭官

之大權也於是有都則司刑者民命之所關也於是
有都士家士此數官者皆列王朝之爵而任都家之
事其治法一體於王官其廢置一聽於冢宰此政教
所以齊一血脉所以流通也

總論易氏祓曰秋官刑官也司寇掌刑士師掌禁自
鄉士至司隸言其用刑者也自布憲至銜叔氏言其
用禁者也用刑則掌戮在後用禁則禁殺戮居先聖
人之意欲申禁以止殺也大行人掌客諸官列於司

寇之屬者其伯夷降典折民惟刑之義與

案自大司寇小司寇士師三長官而下畿內之獄訟鄉士遂士縣士方士主之六服之獄訟訝士主之次以朝士者斷獄弊訟皆於外朝也次以司民者見民者天之所司王之所敬刑罰不可以不中也獄訟既弊有五刑以麗其辟故次司刑有刺宥以議其輕重故次司刺有大亂獄則故府之藏可覆視故次司約有疑獄不決則質之明神故次司盟於是罪輕而贖

刑者則職金受其入罪重而孥戮者則司厲執其法
稍重而未麗於法者則司圜收教已麗於法則囚而
刑殺故掌囚掌戮次之從坐者恕其死因任以事故
司隸罪隸又次之蠻閩夷貉之隸或得之征伐亦以
類附焉繼犬人於司厲者司厲治盜犬能逐盜者也
雖然刑非得已也禁於未發則民安而上不煩故布
憲申禁於天下禁殺戮禁暴氏司禁於國中野廬氏
蜡氏雍氏萍氏司寤氏所以使行者無害死者有主

陸走者無險阻水浮者不沈溺時其宵晝行止以節
皆道路之禁也司烜氏條狼氏修閭氏皆祭祀軍旅
之禁也自冥氏至庭氏十二職草木鳥獸爲民害者
驅而除之義之盡也繼以銜枚氏司鐸者無端歌哭
雜氣妖聲不祥也於是刑事盡矣次以伊耆氏者秋
養耆老故也次以大行人等官者賓位於西北天地
之義氣屬秋也朱子曰凡諸侯朝覲會同禮畢則降
而肉袒請刑司寇主刑故屬焉賓客見王則有儀故

司儀次之而行夫掌小事環人主送逆象胥掌四夷國使以類附焉賓客朝見有饗飧牢禮之歸故掌客次之賓客自來至去皆有訝故掌訝終焉掌交所以



王志於天下之邦國也掌察已下所以達王事於內之都家也

欽定周官義疏卷三十九



覆校官庶吉士臣茅元銘

校對官編修臣鄭 熾

謄錄監生臣徐 松